

# Daing Sulaiman pintas Adib untuk muncul pendahulu

**PENDAYUNG** Terengganu, Daing Sulaiman Daing Suhaimi mencipta kejutan apabila menjuarai Peringkat 4 Pahang Ocean Paddle International Challenge 2022 (POPIC 2022) di Pantai Cherating semalam.

Dalam perlumbaan kategori kebangsaan TK1 lelaki itu, Daing Sulaiman merekodkan masa 2 jam 11 minit 09.49 saat bagi meninggalkan pencabar terdekat dari Pahang, Mohd Adib Kamaruzrikan (2:14:02.75s) dan wakil PDRM, Freddy Anggang (2:14:25.05s).

Kejayaan mengungguli perlumbaan sejauh 20 kilometer itu, sekali gus menyaksikan Daing Sulaiman muncul pendahulu baharu kategori TK1 lelaki apabila memintas Adib dengan perbezaan masa keseluruhan 45s.

"Hari ini, saya berpeluang mendahului Adib apabila dia melakukan sedikit kesilapan di Boya 1. Situasi itu membolehkan saya terus mendahului Adib dan

barisan pencabar yang lain termasuk Freddy untuk berada di depan.

"Untuk perlumbaan terakhir esok, saya akan cuba dengan strategi sama. Paling penting, saya kena pecut awal-awal untuk menjarakkan diri dengan pendayung lain dan kekalkan tempo pada pertengahan sehingga tamat perlumbaan," katanya.

Adib yang menjuarai tiga peringkat sebelum ini di Pantai Hiburan, Rompin; Pantai Lagenda, Pe-



kan dan Pantai Balok, Kuantan pula mengakui dia melakukan kesilapan pada awal perlumbaan sehingga membuka peluang kepada Daing Sulaiman menjuarai Peringkat 4.

"Ya, saya ada buat silap sikit sebab tidak begitu nampak Boya 1 dan akibatnya, Daing Sulaiman berada di depan. Kemudiannya, saya cuba kejar Daing Sulaiman, tetapi dia agak lebih laju untuk terus berada di depan," ujarnya.

Sementara itu, gandingan berpengalaman yang mewakili Pahang, Ahmad Azfaruddin Lukman-Imam Sujadi Satta kembali menjejakkan kaki di podium utama apabila mengungguli kategori TK2 lelaki dengan catatan masa 2:02:18.81s.

Podium kedua menjadi satu lagi milik wakil Pahang, David Bong Xia Shing-Aderian

Adek yang merakamkan masa 2:04:42.18s, manakala pendayung Terengganu, Muhammad Adhwa-Danish Lukman di tempat ketiga dengan catatan 2:06:13.52s.

Bagi kategori TK2 wanita, wakil Terengganu, Norazita-Nursai-bah Syahida Ibrahim muncul juara dengan catatan 2:15:59.75s diikuti Dayang Nur Sakinah-Dayang Nur Hanisah Awang Ali (2:23:47.74s) dan Siti Normah Abdul Rahman-Mustika Ayuni Mustofa (2:27:57.29s).

Bagi kategori inter-varsiti lelaki, status juara kekal milik Tuan Muhamad Hidzam Tuan Dolah-Mohd Azman Ibrahim (UNISZA); naib juara Muhammad Farhan Haqimi Abdul Latiff-Mohamad Faiz Rosdin (UTHM) dan pemenang tempat ketiga Mohamad Izzat-Muhammad Hafizi (UNISZA).

Bagi kategori inter-varsiti wanita, wakil UTHM, Nur Aleya Nafisha Norhanafi-Alya Athirah Shahraraziz muncul juara diikuti Ain Syuhadah Zulkifli-Nur Amira Syafiqah Rosli (UTHM) dan Yusrayah Athirah Yusof-Nor Natasha Mohd Yusof (Outdoor Edit UPSI).



**DAING SULAIMAN (kiri) mengambil kesempatan ekoran kesilapan Adib untuk muncul juara pada Peringkat 4 POPIC 2022 semalam.**

KOSMO 29/9/2022+